



სსიპ ბათუმის შოთა რუსთაველის
სახელმწიფო უნივერსიტეტი

12 თებერვალი, 2026 წელი

წარმომადგენლობითი საბჭოს გადაწყვეტილება №07-01/08

„საჯარო სამართლის იურიდიული პირის - ბათუმის შოთა რუსთაველის
სახელმწიფო უნივერსიტეტის ეთიკის კოდექსის დამტკიცების თაობაზე“ ბსუ-ს
წარმომადგენლობითი საბჭოს 2017 წლის 27 ივლისის №2 გადაწყვეტილებაში
ცვლილების შეტანის შესახებ

„უმაღლესი განათლების შესახებ“ საქართველოს კანონის მე-18 მუხლის, წესდების მე-10 მუხლის, ბსუ-ს ხარისხის უზრუნველყოფის სამსახურის ხელმძღვანელის სამსახურებრივი ბარათის (№51473, 22/01/2026 წ.), საქართველოს განათლების, მეცნიერებისა და ახალგაზრდობის მინისტრის ბრძანებით დამტკიცებული „პროფესიული განათლების მასწავლებლის ეთიკის კოდექსის“ (№161/ნ, 15/10/2024, ძალაში შესვლის თარიღი: 01/01/2026), ბსუ-ს იურიდიული დეპარტამენტის უფროსის სამსახურებრივი ბარათის (№76041, 27/01/2026 წ.), წარმომადგენლობითი საბჭოს რეგლამენტის და წარმომადგენლობითი საბჭოს 2026 წლის 12 თებერვლის №07-01/09 სხდომის ოქმის საფუძველზე წარმომადგენლობითმა საბჭომ

გ ა დ ა წ ყ ვ ი ტ ა :

1. „საჯარო სამართლის იურიდიული პირის - ბათუმის შოთა რუსთაველის სახელმწიფო უნივერსიტეტის ეთიკის კოდექსის დამტკიცების თაობაზე“ ბსუ-ს წარმომადგენლობითი საბჭოს 2017 წლის 27 ივლისის №2 გადაწყვეტილებაში შევიდეს ცვლილება, კერძოდ, №1 დანართის (ეთიკის კოდექსის):

ა) მე-2 მუხლის „ა“ ქვეპუნქტი ჩამოყალიბდეს შემდეგი რედაქციით:

ა) საგანმანათლებლო და სამეცნიერო-კვლევითი პროცესის განმახორციელებელი ბსუ-ს აკადემიური, სამეცნიერო და მოწვეული პერსონალისათვის (შემდეგში „პროფესორ-მასწავლებელი“), ასევე პროფესიული განათლების მასწავლებელთა პერსონალისათვის (შემდეგი „პროფესიული განათლების მასწავლებელი“);“;

ბ) მე-3 მუხლის მე-3 პუნქტის „ა“ ქვეპუნქტი ჩამოყალიბდეს შემდეგი რედაქციით:

„ა) პლაგიატი (ბსუ-ს აკადემიური საბჭოს დადგენილებით დამტკიცებული „ბსუ-ში აკადემიური კეთილსინდისიერების დაცვის წესით“ გათვალისწინებული დარღვევის კატეგორია - მძიმე (უხეში);“

გ) მე-3 მუხლის შემდეგ დაემატოს შემდეგი შინაარსის 3¹ მუხლი:

„მუხლი 3¹. პროფესიული განათლების მასწავლებელი

1. ბსუ-ს პროფესიული განათლების მასწავლებელი თავის პროფესიულ საქმიანობას ახორციელებს საქართველოს კანონმდებლობის, საქართველოს განათლების, მეცნიერებისა და ახალგაზრდობის მინისტრის ბრძანებით დამტკიცებული „პროფესიული განათლების მასწავლებლის ეთიკის კოდექსის“ და ბსუ-ს (პროფესიული საგანმანათლებლო პროგრამების განმახორციელებელი საგანმანათლებლო დაწესებულების) მიერ დადგენილი წესის/წესების შესაბამისად.

2. პროფესიული განათლების მასწავლებლის საქმიანობის ძირითადი პრინციპები და ღირებულებებია:

ა) პროფესიული განათლების მასწავლებელი დაკისრებულ საქმიანობას ახორციელებს კეთილსინდისიერად, პატიოსნად, პროფესიონალურად;

ბ) პროფესიული განათლების მასწავლებელი პროფესიულ საქმიანობაში არის მიუკერძოებელი, ობიექტური, პატივს სცემს სხვათა უფლებებს და ზრუნავს მასწავლებლის პროფესიის იმიჯსა და რეპუტაციაზე;

3. პროფესიული განათლების მასწავლებელი საქმიანობის განხორციელებისას ვალდებულია:

ა) ხელი შეუწყოს ნდობისა და პატივისცემის კულტურის დამკვიდრებას ბსუ-ში; ზოგადსაკაცობრიო (პლურალიზმი, ტოლერანტობა, დემოკრატია), მულტიკულტურული, მულტიეთნიკური, გენდერული თანასწორობის ღირებულებების დამკვიდრებას;

ბ) დაიცვას ბსუ-ს მიერ დადგენილი შინაგანაწესი და უსაფრთხოების წესები;

გ) უზრუნველყოს ისეთი გარემოს შექმნა, რომელიც გამოიწვევს ძალადობასა და დისკრიმინაციას რასის, კანის ფერის, ენის, სქესის, ასაკის, მოქალაქეობის, წარმოშობის, დაბადების ადგილის, საცხოვრებელი ადგილის, ქონებრივი ან წოდებრივი მდგომარეობის, რელიგიის ან რწმენის, ეროვნული, ეთნიკური ან სოციალური კუთვნილების, პროფესიის, ოჯახური მდგომარეობის, ჯანმრთელობის მდგომარეობის, შეზღუდული შესაძლებლობის, სექსუალური ორიენტაციის, გენდერული იდენტობისა და გამოხატვის, პოლიტიკური ან სხვა შეხედულების ან სხვა ნიშნის მიუხედავად;

დ) დაიცვას პროფესიული საქმიანობის ფარგლებში მიღებული ინფორმაციის (მათ შორის, პერსონალური მონაცემების) კონფიდენციალურობა, საქართველოს კანონმდებლობით დადგენილი წესით;

ე) პროფესიული საქმიანობისას (მათ შორის, საგანმანათლებლო რესურსების შექმნისა და გავრცელების პროცესში) დაიცვას სხვა პირთა ინტელექტუალური საკუთრება, მათ შორის გამოგონებები და საავტორო უფლებები;

ვ) იზრუნოს საკუთარ პროფესიულ განვითარებაზე, მუდმივად გაეცნოს სფეროში მიმდინარე სიახლეებს;

ზ) ხელი შეუწყოს პროფესიული რეპუტაციის დაცვას და თავი შეიკავოს ისეთი ქცევისგან, რომელსაც შეიძლება თან ახლდეს პროფესიული განათლების მასწავლებლის პროფესიის დისკრედიტაცია;

თ) გაუფრთხილდეს დაწესებულების მატერიალურ და საგანმანათლებლო რესურსს და გამოიყენოს მხოლოდ დანიშნულებისამებრ (დაუშვებელია მატერიალური და სასწავლო

რესურსის გამოყენება პირადი მიზნებისთვის). რესურსების გამოყენებისას გაითვალისწინოს გარემოსდაცვითი და მდგრადი განვითარების პრინციპები.

4. პროფესიული განათლების მასწავლებლის ურთიერთობა პროფესიულ სტუდენტთან/მსმენელთან უნდა წარმართოს შემდეგი მოთხოვნების გათვალისწინებით:

4.1. პროფესიული განათლების მასწავლებელი ვალდებულია პროფესიულ სტუდენტებს/მსმენელებს მოეცეს ღირსეულად და პატივისცემით;

4.2. პროფესიული განათლების მასწავლებელი საკუთარი უფლებამოსილების ფარგლებში ზრუნავს პროფესიულ სტუდენტთა/მსმენელთა ჯანმრთელობის დაცვასა და უსაფრთხოებაზე.

4.3. პროფესიული განათლების მასწავლებელი პროფესიულ სტუდენტთან/მსმენელთან ურთიერთობისას ვალდებულია:

ა) ხელი შეუწყოს პროფესიულ სტუდენტთა/მსმენელთა პროფესიულ და პიროვნულ განვითარებას;

ბ) შეიმუშაოს სწავლებისა და შეფასების ობიექტური და ინდივიდუალური მიდგომები, ისე რომ დაცულ იქნეს პროფესიულ სტუდენტთა/მსმენელთა ღირსება;

გ) უზრუნველყოს პროფესიულ სტუდენტთა/მსმენელთა თანაბარი და სამართლიანი მოპყრობა, განურჩევლად რასის, კანის ფერის, ენის, სქესის, ასაკის, მოქალაქეობის, წარმოშობის, დაბადების ადგილის, საცხოვრებელი ადგილის, ქონებრივი ან წოდებრივი მდგომარეობის, რელიგიის ან რწმენის, ეროვნული, ეთნიკური ან სოციალური კუთვნილების, პროფესიის, ოჯახური მდგომარეობის, ჯანმრთელობის მდგომარეობის, შეზღუდული შესაძლებლობის, სექსუალური ორიენტაციის, გენდერული იდენტობისა და გამოხატვის, პოლიტიკური ან სხვა შეხედულების ან სხვა ნიშნისა;

დ) მშვიდობიანი გზით მართოს კონფლიქტები ან კონფლიქტური სიტუაცია, ხოლო პროფესიული სტუდენტის/მსმენელის მხრიდან არაეთიკურ ქცევაზე მოახდინოს შესაბამისი რეაგირება;

ე) არ გამოიყენოს პროფესიული სტუდენტის/მსმენელის შესაძლებლობები/რესურსი პირადი მიზნებისთვის;

ვ) დაიცვას პროფესიული სტუდენტის/მსმენელის შესახებ ინფორმაციის კონფიდენციალურობა;

ზ) ხელი შეუწყოს პროფესიულ სტუდენტთა/მსმენელთა ფიზიკურ, სოციალურ და ინტელექტუალურ განვითარებას;

თ) პროფესიულ სტუდენტებს/მსმენელებს შეუქმნას უსაფრთხო, ინკლუზიური და კეთილგანწყობილი სასწავლო გარემო და უზრუნველყოს მათი უნარების განვითარება, მთელი სიცოცხლის განმავლობაში სწავლის ხელშეწყობის პრინციპის გათვალისწინებით.

5. პროფესიული განათლების მასწავლებლის ურთიერთობა პროფესიული სტუდენტის/მსმენელის მშობელთან ან სხვა კანონიერ წარმომადგენელთან უნდა წარმართოს შემდეგი მოთხოვნების გათვალისწინებით (ვალდებულია):

ა) ხელი შეუწყოს დაწესებულებასა და პროფესიული სტუდენტის/მსმენელის მშობელს ან სხვა კანონიერ წარმომადგენელს შორის მჭიდრო თანამშრომლობის დამყარებას;

ბ) პროფესიული სტუდენტის/მსმენელის მშობელს ან სხვა კანონიერ წარმომადგენელს მიაწოდოს ინფორმაცია სასწავლო გეგმისა და სასწავლო პროცესის შესახებ, საჭიროებისამებრ გაუწიოს პედაგოგიური ან პროფესიული კონსულტაცია;

გ) პროფესიული სტუდენტის/მსმენელის მშობელთან ან სხვა კანონიერ წარმომადგენელთან საჭიროების შემთხვევაში დაგეგმოს ინდივიდუალური შეხვედრები.

6. პროფესიული განათლების მასწავლებლის ურთიერთობა დაწესებულების ადმინისტრაციასთან, კოლეგებსა და სხვა დაინტერესებულ მხარეებთან უნდა წარიმართოს შემდეგი მოთხოვნების გათვალისწინებით:

6.1. პროფესიული განათლების მასწავლებელი პატივისცემით ეპყრობა კოლეგებს და ბსუ-ში დასაქმებულ სხვა პირებს, მათ შორის, ხელმძღვანელობას.

6.2. პროფესიული განათლების მასწავლებელი ბსუ-ში დასაქმებულ პირებთან, კოლეგებთან და სხვა დაინტერესებულ პირებთან ურთიერთობაში ვალდებულია:

ა) არ ჩაერიოს კოლეგის საქმიანობაში მისი თანხმობის გარეშე;

ბ) ითანამშრომლოს კოლეგებთან, ბსუ-ში სხვა წარმომადგენლებთან და გაუზიაროს მათ საკუთარი ცოდნა და გამოცდილება;

გ) მხარი დაუჭიროს დამწყებ კოლეგებს და მათი თხოვნის შემთხვევაში დახმარება აღმოუჩინოს პროფესიულ საქმიანობაში;

დ) არ გამოიყენოს კოლეგის/ბსუ-ში დასაქმებული სხვა პირის შესაძლებლობები საკუთარი მიზნებისთვის.

6.3. პროფესიული განათლების მასწავლებელი საკუთარი უფლებამოსილების ფარგლებში თანამშრომლობს დამსაქმებლებსა და სხვა დაინტერესებულ პირებთან, ითვალისწინებს მათ მოსაზრებებსა და რეკომენდაციებს, ხელს უწყობს მათ ჩართულობას საგანმანათლებლო პროგრამის შემუშავების, განვითარების, სწავლებისა და შეფასების პროცესში.“;

დ) მე-5 მუხლის მე-3 პუნქტის „ზ“ ქვეპუნქტი ჩამოყალიბდეს შემდეგი რედაქციით:

„ზ) პლაგიატი (ბსუ-ს აკადემიური საბჭოს დადგენილებით დამტკიცებული „ბსუ-ში აკადემიური კეთილსინდისიერების დაცვის წესით“ გათვალისწინებული დარღვევები);“;

ე) მე-5 მუხლის მე-4 პუნქტის „გ“ ქვეპუნქტი ჩამოყალიბდეს შემდეგი რედაქციით:

„გ) ჩაიდენს ბსუ-ს აკადემიური საბჭოს დადგენილებით დამტკიცებული „ბსუ-ში აკადემიური კეთილსინდისიერების დაცვის წესით“ გათვალისწინებულ მძიმე (უხეში) კატეგორიის დარღვევას;“

ვ) მე-6 მუხლის სათაური და შინაარსი შეიცვალოს და ჩამოყალიბდეს შემდეგი რედაქციით:

„მუხლი 6. აკადემიური და კვლევის ეთიკის დარღვევა

1. ბსუ-ს აკადემიური კეთილსინდისიერების დაცვის პოლიტიკა, მექანიზმები, დარღვევის სახეები, მასზე რეაგირების პროცედურა და სანქციები განისაზღვრება ბსუ-ს აკადემიური საბჭოს დადგენილებით დამტკიცებული „ბსუ-ში აკადემიური კეთილსინდისიერების დაცვის წესით“.

2. ბსუ-ს აკადემიური საბჭოს დადგენილებით დამტკიცებული „ბსუ-ს კვლევის ეთიკის კომიტეტის დებულებით“ განისაზღვრება კვლევის ეთიკის კომიტეტის ფუნქციონირების, უფლებამოსილებებისა და საქმიანობის წესი. კომიტეტის მიზანია უნივერსიტეტში ჩატარებული სამეცნიერო კვლევების საყოველთაოდ აღიარებულ ეთიკურ ნორმებთან შესაბამისობის უზრუნველყოფა, კვლევებში ჩართულთა („კვლევის სუბიექტები“) უსაფრთხოებისა და უფლებების დაცვა. ბსუ-ს კვლევის ეთიკის კომიტეტი საქმიანობის პროცესში გამოვლინილ შესაძლო ეთიკურ დარღვევებს, მათი სიმძიმისა და

შედეგების გათვალისწინებით, ჰყოფს ატეგორიებად და შესაბამისად, განსაზღვრავს რეაგირების ზომებს, კვლევის ეთიკის კომიტეტის დებულების შესაბამისად.“ ;

ზ) მე-7 მუხლის მე-3-5 პუნქტები ჩამოყალიბდეს შემდეგი რედაქციით:

„3. ეთიკის კოდექსის დარღვევისათვის პასუხისმგებლობის შეფარდების შესახებ საკითხის აღმგზის უფლება აქვს უნივერსიტეტის სტუდენტს, პროფესიულ სტუდენტს, დასაქმებულს ან ბსუ-ს კვლევის ეთიკის კომიტეტს.

4. ეთიკის კოდექსის დარღვევაზე რეაგირების მიზნით რექტორის/ადმინისტრაციის ხელმძღვანელის ბრძანებით (მართვის ორგანოთა კომპეტენციის შესაბამისად) იქმნება კომისია, რომელიც საქმიანობას წარმართავს საქართველოს კანონმდებლობის, ამ კოდექსის და ბსუ-ს შინაგანაწესის შესაბამისად, ეთიკური დილემის სახეობის შესაბამისად.

5. აკადემიური კეთილსინდისიერების დაცვის წესით ან/და ბსუ-ს კვლევის ეთიკის კომიტეტის დებულებით გათვალისწინებულ დარღვევაზე რეაგირების მიზნით იქმნება ბსუ-ს ეთიკის კომისია, რომელიც საქმიანობას წარმართავს წინამდებარე კოდექსით, ბსუ-ს აკადემიური საბჭოს დადგენილებით დამტკიცებული „ბსუ-ში აკადემიური კეთილსინდისიერების დაცვის წესით“, ბსუ-ს კვლევის ეთიკის კომიტეტის დებულებით და ბსუ-ს შინაგანაწესით გათვალისწინებული პროცედურების შესაბამისად.“.

2. გადაწყვეტილება (ასევე ეთიკის კოდექსის კოდიფიცირებული ვერსია) გამოქვეყნდეს ბსუ-ს ოფიციალურ ვებგვერდზე.
3. ამ გადაწყვეტილებით განხორციელებული ცვლილებების გათვალისწინებით, ბსუ-ს ეთიკის კოდექსის კოდიფიცირებული ვერსია მომზადდეს და გამოქვეყნდეს ბსუ-ს ოფიციალურ ვებგვერდზე (იურიდიული ცნობარის ველში „საუნივერსიტეტო ნორმატიული აქტები“; ჩანაცვლდეს „სტუდენტთა გზამკვლევის“ ველში შესაბამისი დანართი, ასევე პროფესიული პროგრამების მართვისა და უწყვეტი განათლების ცენტრის ველში - „მარეგულირებელი აქტები“).
4. გადაწყვეტილება დაეგზავნოს ბსუ-ს მართვის ორგანოებს, რექტორის მოადგილეებს, ფაკულტეტებს, სამეცნიერო-კვლევით ინსტიტუტებს, ყველა სტრუქტურულ ერთეულს, ბსუ-ს პერსონალს, ასევე სტუდენტებს და პროფესიულ სტუდენტებს.
5. გადაწყვეტილება ძალაშია ბსუ-ს ვებგვერდზე გამოქვეყნებისთანავე.
6. გადაწყვეტილება შეიძლება გასაჩივრდეს კანონმდებლობითი დადგენილი წესით მისი ძალაში შესვლიდან ერთი თვის ვადაში ბათუმის საქალაქო სასამართლოში (ქ. ბათუმი, ს. ზუბალაშვილის ქ. N30).

წარმომადგენლობითი საბჭოს

თავმჯდომარე, პროფესორი

ჯემალ კარალიძე

